

Macruns, madrazzas e skuters pils fugitivs dall'Ucraina

Il venderdis e la sonda vargada han l'Uniun samaritana Mustér, la Giuventetgna Cadi, la vischnaunca da Mustér e la Fundaziun «Tür auf – mo vinavon» rimnau rauba pils fugitivs dall'Ucraina. L'acziun ei vegnida coordinada cun «ukrainehilfe.gr». In e scadin ha saviu purtar sacs da durmir, madrazzas, cozzas ni era victualias ed artechels da higiena alla staziun dalla Viafier retica a Mustér. Da quella pusseivladad ha fetg bia glied dalla regiun fatg diever. Las gidontras ed ils gidonters han giu da far ils mauns pleins per sortir e magasinar la rauba. Sco quei ch'il meinafatschenta da «Tür auf – mo vinavon», ser *Christoph Zingg*, ha detg enviars la FMR, ha la glied purtau surtut madrazzas e resti da letg, mo lu era vivonda: «Nus havein survegniu fetg bia rauba, igl ei sensaziunal co la glied segida.» Ils proxims dis han ils fugitivs che han dimora ella regiun la pusseivladad d'eleger quei ch'els basegnan. L'ulteriura rauba va allura als cunfins dalla Pologna e l'Ucraina nua che fetg biars fugitivs sesanflan il mument. (fmr/hh)

La rauba vegn sortida ed emplunada. Foto Hans Huonder